

# «Il Grischun s'identifitgescha cun la trilinguitad»

■ **(anr/fa) Cun 54 pertschient vuschs affirmativas han acceptà las Grischunas ed ils Grischuns la nova Lescha da linguas dal chantun Grischun. Questa decisiun onurescha a l'avis dals aderents la lavur da regenza e cussegl grond.** Dumengia a las quatter a Cuira en il foyer da l'edifizi dal cussegl grond: Ils commembers dal comité «Pro Lescha da linguas dal chantun Grischun» salidan cun fatscha rienta ils represchentants dals meds da massa. Els als avevan envidà per commentar ils resultats da la votumaziun. «Nus essan fitg cuntents e satisfats da quest resultat», din *Vincent*

*Augustin*, il president da la Lia Rumantscha, e *Sacha Zala* che presidiescha la Pro Grigioni Italiano. Ensemen han els manà il comité pro.

## L'identitad en il center

Il fatg che la nova lescha da linguas è vegnida approvada interpretescha il comité sco indizi che las mesiras da protezzion prevesidas per il rumantsch e per il talian vegnan consideradas sco necessarias. «La maioritad tudestga dal Grischun ha demussà la solidaritad politica necessaria cun las duas cuminanze linguisticas pli flaihlas», ha ditg Augustin, «lur solidaritad è anc adina gronda, be cun las duas dumondas areguard las plazzas da lavur tar il chantun ed ils dretgs dals da lingua tudestga en vischnancas rumantschas han els forsa in zic fadia.» *Grazia* al referendum che ha provotgà sco ch'el ha cuntinuà «ina vasta discussiun davart las linguas ha survegnì la lescha uss ina legitimaziun anc pli ferma.» Che la lescha saja impurtanta per il rumantsch e per il talian, ha menziunà Zala, «er sch'ins na dastga betg exagerar e spetgar ch'ella schlia tut noss problems.»

## Surlevtg er da vart da la regenza

Cussegliaer guvernativ *Claudio Lardi* ha menziunà ch'el saja cuntent e surveglia dal resultat: «Surtut hai jau er plaschair per mes collavuratur *Silvio Jörg* ed *Ivo Berther* che han lavurà bleras uras, emnas e mais per il success da questa lescha.» Las cifras sezzas nun ha'l sco ch'el ha ditg anc analisà «e jau na'm fatsch la fadia da chattar in foss tranter ils Grischuns.» Ch'el constateschia simplamain che la lescha



**Vincent Augustin e Sacha Zala (da san.) èn satisfats e cuntents dal resultat.** FOTO F. ANDRY

saja vegnida acceptada sunter ina discussiun cuntraversa ed haja plaschair da quai. Lardi sa legra che quest resultat saja er in signal positiv envers la confedera-

ziun. «Uss ans mettain nus a la lavur per decider las leschas adesivas», infurmescha il cussegliaer guvernativ, «e quai vegn a schabegiar durant ils proxims mais.»

## Schnyder betg surprais

«Natiralmain avess jau gù gugent in auter resultat, ma jau saveva ch'i na saja betg simpel, perquai nun esa per mai ina surpraisa», di *Peter Schnyder*, il qual aveva lantschà il referendum cunter la lescha da linguas, «però che Tavau ha ditg mo stgars na è bain in zic ina surpraisa.» En quai che re-

guarda il signal positiv envers la confederaziun manegia l'advocat d'Aschera ch'el era adina da l'avis ch'i sa tractia d'ina lescha primarmain per il chantun Grischun e betg in signal per Berna. Ulteriurs pass cunter la lescha nun ha'l betg l'intenziun da far.